



Stručna služba općinskog vijeća i općinskog načelnika

Broj: 01/1-02-947/18

**PRIJEDLOG**

Ilijaš, 26.04.2018. godine

**Z A P I S N I K**

sa 19. (devetnaeste) sjednice Općinskog vijeća Ilijaš, održane dana 26.04.2018. godine, sa početkom u 10:00h.

Devetnaestom sjednicom Općinskog vijeća Ilijaš predsjedavao je zamjenik predsjedavajućeg g-din Alen Hasković.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	MAHIR DEVIĆ
2	ANEL BUMBULOVIĆ
3	MUAMER DERVIŠEVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	SAUDIN DURMIĆ
8	ARMIN MATORUGA
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	<b>SDP</b>
15	ALAN ŠERAK
16	DAMIR FILIPOVIĆ
17	MIRSAD OSMANOVIĆ
	<b>SBB-FAHRUDIN RADONČIĆ</b>
18	AKIF BEŠLIJA
	<b>BPS-SEFER HALILOVIĆ</b>
19	MUHAMED HANDŽIĆ
20	ALMIR ŠPIODIĆ
	<b>GS</b>
21	EDHEM HASANOVIĆ
22	-
	<b>SAMOSTALNI VIJEĆNIK</b>
23	SEMIR DIZDAREVIĆ
	<b>LDS</b>
24	MEHO DŽINDO
	<b>STRANKA ZA SREDNJE</b>
25	-

Odsutni vijećnici:

1. Asim Mujić i
2. Besim Gljiva.

Prisutni gosti:

1. Aida Muratović – Radio Ilijaš
2. TV Vogošća
3. TV SA
4. Alen Matoruga – predsjednik Savjeta MZ Misoča
5. Mirsad Hamzić - predsjednik Savjeta MZ Malešići
6. Mehmed Smajlović – predsjednik Savjeta MZ Mrakovo
7. Belma Zukić – direktorica JKP "Vodostan" Ilijaš
8. Benis Fazlić – direktor Radio Ilijaša
9. Amra Matoruga – direktorica JU "Dom zdravlja" Ilijaš
10. Nihada Ibrahimović – predstavnik JU "Zavod za zaštitu žena i materinstva" Kantona Sarajevo
11. Amela Komilija – predstavnik Zavoda za hitnu medicinsku pomoć – Rukovodilac edukativnog centra
12. Maida Šuško-Gluho-zamjenica pravobranioca – Pravobranilaštvo Kantona Sarajevo
13. Samir Termiz – sekretar Pravobranilaštva
14. Mujo Subašić – tehničar Zavoda za hitnu medicinsku pomoć
15. Volonteri: Nejra Ćosić, Salkuna Salihović, Sanela Omerović i Samir Fazlić

Ostali prisutni:

1. Akif Fazlić – općinski načelnik
2. Meliha Avdibegović – pomoćnik načelnika
3. Sanja Zagorac-Jozić – pomoćnik načelnika
4. Sadeta Brkić – pomoćnik načelnika
5. Merima Osmanović – pomoćnik načelnika
6. Nijaz Spahić – pomoćnik načelnika
7. Zdravko Barić – pomoćnik načelnika
8. Aziz Fazlić – pomoćnik načelnika
9. Ilda Kahriman – sekretar OV-a Ilijaš
10. Nermina Avdukić – stručni saradnik za informacije
11. Maida Habibović – zapisničar
12. Mirza Dinar – IT administrator

ALEN HASKOVIĆ – zamjenik predsjedavajućeg

Otvorio je sjednicu i konstatovao da je prisutno 23 vijećnika.

Zatim je dao na razmatranje zapisnik sa 18. sjednice OV-a.

Primjedbi na zapisnik nije bilo, pa je Općinsko vijeće jednoglasno usvojilo zapisnik sa 18. sjednice OV-a Ilijaš.

Pročitao je predloženi dnevni red i dao na razmatranje.

AKIF FAZLIĆ – općinski načelnik

Ja kao predlagač tačku 4. Prijedlog Odluke o izmjeni Odluke o davanju saglasnosti za provođenje postupka koncesije na eksploataciju mineralnih sirovina-krečnjaka na lokalitetu "Šabanci" Ilijaš povlačim. Vi znate da smo na Općinskom vijeću dali saglasnost na ovu osnovnu Odluku, koncesionar je u postupku pribavljanja svih dokumenata koji su potrebni da se dođe do koncesionog ugovora, sa Ministarstvom za privredu Kantona Sarajevo, praktično došao do potpisivanja koncesionog ugovora. Komisija je od strane kantona formirana i ona je prije 20-tak dana predložila stanovite izmjene na lokalitetu, gdje se površinski nije tretiralo izmjenama ništa, nego samo granicama kako bi se uspostavio efikasniji saobraćajni red na tom lokalitetu. Kada je pokrenuta ta inicijativa, mi smo je uvrstili u Dnevni red, poslije narednih zasjedanja Komsije za koncesije, ustanovilo se da bi ova mala izmjena praktično tražila da potencijalni koncesionar mora ponovo krenuti sa papirima ispočetka, sa novim elaboratima. Zahtjev Komsije za ovu izmjenu je storniran, ona prihvata stanje onako kako jeste, kako je prvim elaboratom utvrđen taj obuhvat, a to je definisamo našom odlukom Vijeća i to je razlog povlačenja ove tačke.

Obzirom da primjedbi i prijedloga više nije bilo, OV-e jednoglasno usvojilo slijedeći

### **DNEVNI RED**

1. Vijećnička pitanja i inicijative
2. Izvještaj o realizaciji zaključaka sa 18. sjednice
3. Prijedlog Odluke o novčanim podrškama u poljoprivrednoj proizvodnji na području općine Ilijaš za 2018. godinu
4. Prijedlog Odluke o neposrednoj pogodbi za prodaju neizgrađenog građevinskog zemljišta (k.č.br.325/2 K.O. Ilijaš Grad)
5. Prijedlog Odluke o načinu i uslovima prodaje neizgrađenog građevinskog zemljišta (k.č.br.1047/5, k.č.br.1047/4, k.č.br.1048/3 i k.č.br.1048/10)
6. Izvještaj o radu Pravobranilaštva Kantona Sarajevo za Općinu Ilijaš za 2017. godinu
7. Prijedlog Zaključka kojim se usvaja Izvještaj o radu i finansijskom poslovanju JU "Kulturno-sportski centar i Radio Ilijaš" za 2017. godinu
8. Prijedlog Odluke o davanju saglasnosti na Plan rada JU "Kulturno-sportski centar i Radio Ilijaš" Ilijaš za 2018. godinu
9. Izvještaj o radu i poslovanju JKP "Vodostan" d.o.o. Ilijaš za period 01.01.-31.12.2017. godine
10. Informacija u oblasti zdravstva na području općine Ilijaš za period 01.01.-31.12.2017.godine.

AD-1

Vijećnička pitanja i inicijative

MAHIR DEVIĆ – predsjedavajući

Inicijativa:

Vi ste svjedoci da smo u oblasti zdravstva jako puno investirali da popravimo stanje i prethodni saziv Općinskog vijeća, kao i ovaj saziv, pravili smo sastanke i pokušavali da to izdignemo na veći nivo i na neki način smo uspjeli, barem u infrastrukturnom smislu da stvari pomaknemo naprijed. Imamo stalno probleme vezano za kadrovska pitanja, specijalističke službe tipa neurologa, kardiologa, ginekologa i drugih stvari. Ja cijenim da

smo mi došli kao Općinsko vijeće u situaciju da pokrenemo jednu vrstu inicijative, da se mi na neki način obratimo Zavodu zdravstvenog osiguranja Kantona Sarajevo, da zadužimo načelnika da proba organizirati jednu vrstu sastanka, na kojoj bi se tražilo od Zavoda zdravstvenog osiguranja da se privatni sektor počne uvoditi u domen javnog zdravstva na području općine Ilijaš. Sve što nam ne pruže kroz javnu upravu domovi zdravlja Kantona Sarajevo, ukoliko nam Zavod zdravstvenog osiguranja pronađe potencijalnog s kim bi sklopio ugovor i platio ja sam potpuno ubijeđen da bi na taj način dobili kvalitetne kadrove i kada su u pitanju kardiohirurzi i druge specijalističke službe. Ja cijenim da mi kao Vijeće trebamo pokrenuti tu vrstu inicijative i pretočiti je u Zaključak. Hoće li od nje sada nešto biti ili neće, to je pitanje sada tih sastanaka i predlažem da Zaključkom Općinskog vijeća zadužimo načelnika da se organizira takva vrsta sastanka, kao što imamo situaciju i sa apotekama, ljudi odu na isti recept, istu zdravstvenu knjižicu, podignu lijek u Podlugovima u privatnoj apoteci, njima Zavod to plati. Zašto bismo mi kao građani ovdje čekali da imamo kardiohirurga, danima, mjesecima, godinama dolazimo u situaciju da nam ljudi umiru od srčanih oboljenja a nemamo adekvatne ljude. Ako postoji neko u privatnom sektoru, na nivou kantona ko će obezbijediti stručnjaka, a ova varijanta ovdje nije moguća a znate i zbog čega. Slušali ste intervju generalnog direktora Domova zdravlja i vidjeli ste da se oni sada nalaze u još većim kadrovskim problemima, 60 iskusnih doktora sa dugogodišnjim radom odlazi u penziju, ulazi mlađa ekipa kojoj zaista treba i vremena da se obuča, ali ja cijenim da mi kao Općinsko vijeće ne trebamo više zaista, pogotovo u oblasti zdravstva dozvolimo nikome da se igra sa ovim. Ako smo mi uložili milione i stali iza svega ovoga, ja cijenim da mi nivo zdravstvene usluge moramo podići na veći nivo. To smo bili uradili u onom domenu u kojem smo mogli, ali u struku nismo mogli ulaziti. Predlažem zaključak da Općinsko vijeće navedenu inicijativu smatra opravdanom, da zadužujemo načelnika općine Ilijaš da organizira sastanke na relaciji Zavoda zdravstvenog osiguranja, eventualno domovi zdravlja Kantona Sarajevo, potencijalne privatne klinike koje bi mogle pružiti neku vrstu takve zdravstvene zaštite koje bi imale interes da investiraju na području općine Ilijaš, da naprave tu neku kliniku, da im Zavod zdravstvenog osiguranja omogući onaj vid i one vrste specijalističkih službi koji nama ovdje najviše škripi. Cijenim da bi ova inicijativa trebala biti podržana od strane cijelog Općinskog vijeća.

ARMIN MATORUGA - vijećnik SDA

Inicijative:

1. Obraćam vam se ovom inicijativom s ciljem utvrđivanja odgovornosti pri deponovanju otpadnog materijala na dionici puta Malešićki most-Donja Karaula.

Molimo nadležnu službu da se očituje po ovom pitanju, te u narednom periodu naredi odgovornim firmama čišćenje nepropisno deponovanog materijala.

Obrazloženje: U toku prošle 2017. godine za vrijeme izvođenja radova na projektima "Izrada fekalne kanalizacije Malešići" koje je izvodila kompanija "TB Inžinjeri" Breza i rekonstrukcija puta "Intal Bosna" koje je izvodila kompanija "Geoput" Maglaj izvršeno je ne propisno deponovanje materijala na pomenute lokacije. Deponovanje ovog materijala izvršeno je bez dozvole općine Ilijaš, na što je Savjet MZ Stari Ilijaš ukazivao u par navrata.

2. Pokrećem inicijativu prema JP Elektroprivreda BiH Sarajevo s ciljem transformatorske stanice za naselje Karaula, odnosno Gornja Karaula

Obrazloženje: Mjesna zajednica Stari Ilijaš u više navrata se obraćala spomenutom

preduzeću i povratnim aktom br. 03-4-34222-34076/2012. U odgovoru je da je izgradnja trafostanice planirana u periodu 2014/2017. Obzirom da je sada 2018. godina zanima me kada je stvarno planirana izgradnja trafostanice Karaula i dao kada će građani Karaule uredno plaćati neadekvatnu isporuku električne energije od strane Elektroprivreda Sarajevo.

Napomena: Obzirom da je ovo šesta sjednica po redu, a da nisam dobio odgovor, građani su pokrenuli peticiju koju ću dostaviti nadležnoj službi do sljedećeg vijeća.

ALMIR ŠPIODIĆ – vijećnik BPS-Sefer Halilović

Pitanja:

1. Kada će izvođač radova koji je prošao na tenderu i potpisao ugovor sa općinom Ilijaš početi sa radovima na Društvenom domu u Podlugovima?

Ja sam ovo pitanje postavljao i prošle godine u 11-om mjesecu kada se trebalo početi sa radovima na rekonstrukciji Društvenog doma u Podlugovima. Dobio sam odgovor da je ugovor potpisan 15.11.2017. godine, a sporazumno raskinut 22.11.2017. godine zbog nepovoljnih vremenskih uslova kako ste naveli u članu 2. Sporazuma o raskidu ugovora. Također ste naveli u odgovoru da će se pristupiti zaključivanju novog ugovora čim se steknu povoljni vremenski uslovi za izvođenje radova u vrijednosti od 155.000,00 KM koliko je planirano budžetom za 2018. godinu.

2. BH Telekom ponovo ne radi svoj posao kako treba. Na više mjesta, u naselju Sovrle i Vratuša su ponovo ostavili iskopane rupe za šahtove koje nisu zaštitili i to tako stoji evo već mjesec dana.

ALMA OMEROVIĆ – vijećnica SDA

Inicijativa:

Pokrećem inicijativu prema nadležnoj općinskoj službi da provjeri stanje potpornog zida u Ljubnićima, tačnije na mjestu prije mosta s lijeve strane, a koje je radila firma "Miprogradnja" koja je ujedno i vlasnik. Naime, svakodnevno stanovništvo prolazi pored napuklog zida, a posebno su ugroženi životi djece. Molim vas da hitno izađete na teren i poduzmete sve mjere bezbjednosti.

RASIM ŠEHIĆ – vijećnik SDA

Inicijativa:

Pokrećem inicijativu da se utvrdi ispravnost brojila za električnu energiju kao i eventualni uzrok problema mnogostruko većih iznosa računa koji dolaze većem broju korisnika u odnosu na protekli period.

Obrazloženje: Građani MZ Kamenica (naselje Crna Rijeka) već duži vremenski period imaju problem sa iznosom računa koji im dolazi za utrošenu električnu energiju. Grupa građana je iznijela pritužbu da dobivaju mnogostruko veće iznose računa nego što u stvarnosti troše. S tim u vezi, iznijeli su prijedlog da se ispita ispravnost brojila ili drugi eventualni problem po čemu su su pojedinačno obraćali u Poslovnu jednicu Elektroprivrede Ilijaš gdje je izvršena reklamacija računa kako je navedeno na tom sastanku.

ADEM ALIĆ – vijećnik SDA

Pitanje:

Postavljam pitanje za nadležne općinske organe i Direkciju za ceste Kantona Sarajevo, dokle se došlo sa realizacijom planiranog postavljanja saobraćajne signalizacije na putu Ilijaš-Mrakovo?

SEMIR DIZDAREVIĆ – samostalni vijećnik

Inicijativa:

Pokrećem inicijativu da se izvrši zamjena rasvjetnih tijela u dijelu ulice Bosanski put prema željezničkoj stanici.

Obrazloženje: Na pomenutoj lokaciji (ulica od Žute radnje-Tranzit benzinske pumpe prema naselju Luka, odnosno prema željezničkoj stanici, slika ulice u prilogu) došlo je do pucanja rasvjetnih tijela ulične rasvjete. Jedna od pomenutih sada visi i u svakom trenutku može pasti ili na pješake ili na vozila, a većina sijalica ne radi.

Prilog: slika

AKIF FAZLIĆ – općinski načelnik

Uputili ste vi pitanja i inicijative, ali imam potrebu da kažem vezano za pitanje upućeno za ugovor za izgradnju, odnosno rekonstrukciju doma u Podlugovima. Nažalost moram priznati ovdje slabost koja je proistekla i od strane službi i slabosti koje su tek utvrđene nakon dugo vremena u projektnim rješenjima. Mi smo najavili krajem maja da ćemo započeti rekonstrukciju, vi znate da je tenderska procedura završena, ja želim kazati da ćemo najdalje do sredine maja krenuti sa tim projektom. Ovaj projekat je vrlo važan i on je stvar naše odgovornosti, najavili smo ga, odredili sredstva tako da želimo da se on na efikasan način realizuje.

Ovo što je predsjedavajući rekao, vezano za ovu inicijativu, mislim da je ona dobra, ono što je najbitnije za ovu inicijativu bit će stvar interesa privatnih institucija iz ove oblasti, njihove opravdanosti, ulaganja i ja ću biti sretan ako takvih ima i ako te studije pokažu da oni zaista mogu otvoriti ovdje dodatnu vrstu usluga iz oblasti zdravstva, tako da ja zaista podržavam ovu inicijativu.

MAHIR DEVIĆ – predsjedavajući

Obrazloženje zaključka: zbog sve češćih problema u smislu obavljanja zdravstvenih usluga na području općine Ilijaš, u smislu limitiranih pregleda, duge liste čekanja i sve lošijeg kvaliteta pružanja zdravstvenih usluga, od strane javne ustanove domovi zdravlja Kantona Sarajevo, Općinsko vijeće donosi zaključak:

Zadužuje se načelnik Općine Ilijaš da u narednom periodu organizuje sastanak sa Ministricom zdravstva Kantona Sarajevo, direktorom Zavoda zdravstvenog osiguranja Kantona Sarajevo i zainteresovanim predstavnicima Privatnih zdravstvenih ustanova, kako bi se obezbjedile kvalitetnije zdravstvene usluge na području općine Ilijaš u smislu specijalističko-konsultativnih službi koje bi se u budućnosti pružale od strane Privatnih zdravstvenih ustanova.

Zamjenik predsjedavajućeg je dao na glasanje prijedlog Zaključka.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo navedeni Zaključak.

#### AD-2

Izveštaj o realizaciji zaključaka sa 18. sjednice

Diskutanata po ovoj tački dnevnog reda nije bilo, obzirom da nije bilo zaključaka

#### AD-3

Prijedlog Odluke o novčanim podrškama u poljoprivrednoj proizvodnji na području općine Ilijaš za 2018. godinu

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o novčanim podrškama u poljoprivrednoj proizvodnji na području općine Ilijaš za 2018. godinu

#### AD-4

Prijedlog Odluke o neposrednoj pogodbi za prodaju neizgrađenog građevinskog zemljišta (k.č.br. 325/2 K.O Ilijaš Grad)

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o neposrednoj pogodbi za prodaju neizgrađenog građevinskog zemljišta (k.č.br. 325/2 K.O Ilijaš Grad)

#### AD-5

Prijedlog Odluke o načinu i uslovima prodaje neizgrađenog građevinskog zemljišta (k.č.br.1047/5, k.č.br.1047/4, k.č.br.1048/3 i k.č.br.1048/10)

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o načinu i uslovima prodaje neizgrađenog građevinskog zemljišta (k.č.br.1047/5, k.č.br.1047/4, k.č.br.1048/3 i k.č.br.1048/10)

#### AD-6

Izveštaj o radu Pravobranilaštva Kantona Sarajevo za Općinu Ilijaš za 2017. godinu

MAIDA ŠUŠKO-GLUHO - zamjenica pravobranioca

Ispred vas se nalazi Izveštaj o radu Pravobranilaštva Kantona Sarajevo za 2017. godinu. U uvodnim napomenama smo se osvrnuli na nadležnost Pravobranilaštva, na zakonske propise na temelju kojih Pravobranilaštvo radi, naveli smo vam postupke u kojima Pravobranilaštvo zastupa imovinu i imovinske interese općine Ilijaš. U tabelarnom prikazu imate pregled statističkih podataka prema vrsti predmeta koji su prenešeni iz prethodnih godina, koji su riješeni i zbog toga smatram da ih nije potrebno detaljno obrazlagati. Važno je istaći da je ovdje navedeno 163 predmeta, od kojih je 67 parničnih, 25 izvršnih, 12 vanparničnih, 20 upravnih, 1 mišljenje, 1 upravni spor, 35 mišljenja u vezi sa

nadležnosti Pravobranilaštva shodno odredbama člana 16. Zakona o građevinskom zemljištu i člana 363. Zakona o stvarnim pravima. Po vrsti predmeta, najveći broj postupaka u kojima Pravobranilaštvo zastupa su predmeti koji se odnose na raznovrsne naknade šteta, na sporove radi utvrđivanja prava vlasništva, stambene radnje i ostali sporovi. U odnosu na prethodne godine, u Izvještaju o radu Pravobranilaštva za 2017. godinu, prema mišljenju Kolegija izdvojili smo najznačajnije predmete u kojima je Pravobranilaštvo najaktivnije uzelo učešće, zatim one sporove koji su po vrijednosti itekako bili značajni. Parnica po tužbi Hasić Sejdalije i firme "HAS-NER" d.o.o Iliđa je bila parnica koja se odnosila na naknadu štete izgubljene dobiti, vrijednost spora je bila preko 42.000 KM. Važno je da je ovaj tužbeni zahtjev odlukom općinskog suda u Sarajevu odbijen kao neosnovan, da je tuženi Sejdalija u obavezi da naknadi štetu općini Ilijaš, ali da presuda još uvijek nije pravosnažna i da se kao takva nalazi po žalbi Kantonalnog suda. Također, parnica po tužbi Radivoja i Zupur Nedeljka, je bila parnica radi sticanja prava vlasništva dosjelošću. U pitanju je bila šuma i šumsko zemljište, vodeći računa o članu 42. Zakona o šumama, koji je striktno propisao da se nad šumama ne može steći pravo vlasništva dosjelošću. Pravobranilaštvo je i u tom smjeru zastupalo općinu Ilijaš, sud je odlukom prekinuo postupak i po žalbi Pravobranilaštva predmet se nalazi na Kantonalnom sudu u Sarajevu.

Značajna je bila i tužba općine Ilijaš protiv Mojsilovića, radi utvrđivanja prava vlasništva. Parnični postupak temeljio se na kupoprodajnom ugovoru koji je općina Ilijaš zaključila sa tuženim. Radilo se o zakonitom i savjesnom posjedniku, to je sportski poligon igrališta, u kojem se općina nalazila u posjedu od 1983. godine. Prvostepena presuda je bila u korist općine Ilijaš, drugostepena je kao takva potvrđena, revizija je odbačena. Svi tuženi nisu blagovremeni mogli zaprimiti presudu, međutim te su tehničke smetnje otklonjene, upisana je općina Ilijaš kao vlasnik u zemljišne knjige i taj postupak je okončan. Što se tiče radnih sporova, parnica je bila samo jedan radni spor, tužitelja Čimpo Sulejmana, u pitanju su bila potraživanja iz radnog odnosa koje se odnose na topli obrok, regres, nagradu za postignute rezultate u radu. Nakon provedenog dokaznog postupka i zaključenja glavne rasprave općinski sud u Sarajevu donio je presudu kojom se tužitelj odbija sa tuženim zahtjevom dok se u dijelu koji se odnosi na jubilarnu nagradu tužba odbacuje. Na donesenu presudu tužitelj je izjavio žalbu i predmet se nalazi u radu na Kantonalnom sudu u Sarajevu.

Parnice po osnovu tužbi radi naknade štete zbog ugriza pasa lutilica, imale su tendenciju rasta u 2017. godini. Imajući u vidu Zakona o zaštiti i dobrobiti životinja, Zakon o komunalnim djelatnostima, mjere koje mi poduzimamo i način na koji mi zastupamo i branimo ide u tom smjeru. Međutim, jedna praksa prvostepenog suda jeste da su nadležne općine na čijoj teritoriji se takva šteta desi i Kanton i Kantonalno javno preduzeće ukoliko je ono tuženo.

Parnice po tužbi općina Ilijaš protiv tuženog Zakošek Zorana, tužba je bila radi iseljenja i predaje u posjed stana. Tužitelj je bila općina Ilijaš, u tužbenom zahtjevu Pravobranilaštvo je istaklo da ukoliko tuženi u zakonskom roku ne podnese odgovor na tužbu da se donese presuda zbog propuštanja što se u ovom slučaju i desilo. Tuženi je podnio prijedlog za povraćaj u prijašnje stanje i ročište je zakano u šestom mjesecu 2018. godine. U ovom izvještaju smo izdvojili i jedno izvršenje, izvršenje koje je obilježilo 2017. godinu. U pitanju je bio tražioc izvršenja općina Ilijaš, koja je protiv Udobnosti d.o.o. imala pravosnažnu presudu u visini od 143.404,80 KM i vrijednosti troška postupka oko 3.000 KM. Prijedlog za izvršenje podnesen je na nepokretnosti pravnog lica, sud je donio rješenje o izvršenju, međutim u tom izvršnom postupku uložen je prigovor trećeg lica, to je bila firma "Forma Casa" koja je prigovarala da ona na toj predmetnoj nekretnini ima upisanu predbilježbu prava vlasništva i da se prodaja kao takva treba proglasiti



nemogućom. Firma je kao takva upućena na parnicu, ustali su sa prijedlogom za donošenje mjere osiguranja kojom se prodaja proglašava nedopuštenom jer su oni vlasnici. Sud je u prvostepenom postupku i odredio takvu mjeru, uloženom žalbom od strane Pravobranilaštva, naša žalba je uvažena, odbijen je prijedlog za određivanje sudske mjere, tako da se izvršni postupak nastavlja, ročište je zakazano za april mjesec tekuće godine. Što se tiče mišljenja, vidjeli ste koliko je Pravobranilaštvo dalo mišljenja za proteklu godinu, prema navedenoj zakonskoj regulativi člana 16. Zakona o građevinskom zemljištu, obaveza je vas kao Općinskog vijeća da prije dodjele neizgrađenog građevinskog zemljišta pribavite mišljenje nadležnog pravobranioca, pa je takvih mišljenja u 2017. godini bilo 35. Značajno mišljenje je bilo koje je dato od kupca "Lift Consalting", mislim da je to sada došlo u jednu završnu fazu, jer se radilo o tehničkim nedostacima koji su se prethodno morali otkloniti, tipa da je općina bila greškom upisana kao suvlasnik pa da je ta greška ispravljena u zemljišnim knjigama Općinskog suda, da je na jednoj parceli bio upisan potok kao javno dobro, pa je i to uspjelo da se otkloni. Sada imamo samo jednu grešku odluke i katastra koja je ispravljena i koja je u fazi završetka i pribavljanja tog pozitivnog mišljenja. Ocjena stanja i postignuti rezultati u 2017. godini su prema mišljenju Pravobranilaštva na zadovoljavajućem nivou. Pravobranilaštvo na čelu sa pravobraniocem ima šest zamjenika i mi smo kadrovski ojačani 2017. godine, kada smo dobili dva državna službenika, kolegu koji je dugo radio na obavljanju imovinsko pravnih odnosa i naša tendencija će biti da u 2018. godini radimo što bolje i da postignemo što veće uspjeh.

MEHMED SMAJLOVIĆ – predsjednik Savjeta MZ Mrakovo

Drago mi je da razmatramo Izvještaj Pravobranilaštva, ja nemam neke značajnije primjedbe ali želim nešto da kažem. Da li ćemo se mi ojačati, da li ćemo primiti odgovornost na sebe, ali mi u Mjesnoj zajednici nemamo nadležnosti da rješavamo imovinsko pravne odnose. Ja apelujem sa ove govornice da ovo uvedemo u sistem. Mjesna zajednica Mrakovo, predmet oštra krivina, poznat je načelniku i službi, ona se 5-6 godina rješava i Vijeće je donijelo Odluku da je od javnog interesa, projekat napravljen da se to uradi. Ja pokrećem inicijativu da se taj predmet nađe, da se stavi u prioritet rješavanja i da se to riješi. Imamo dobru volju i investitora i želim da se ovaj predmet stavi u prioritet rješavanja. Također me zanima da li je on na sudu, ako jeste to bi Pravobranilaštvo trebalo da zna, ako nije ko je zatajio u ovom predmetu. Predlažem da se ovaj predmet stavi u prioritet rješavanja, a imovinsko pravne odnose da mi u općini Ilijaš rješavamo na neki drugi način, ne mogu više ni predstavnici ni vijećnici, ovdje ne sjede inspektori ni građevinski ni komunalni, a državni službenici primaju platu. Mi smo volonteri i mi dosta radimo u sklopu ovoga. Ja još jednom čestitam dosadašnjem radu i načelniku, službi i Pravobranilaštvu, ali evo konkretno sam osjetio nešto da trebam kazati po ovom predmetu.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Izvještaj o radu Pravobranilaštva Kantona Sarajevo za Općinu Ilijaš za 2017. godinu

AD-7

Prijedlog Zaključka kojim se usvaja Izvještaj o radu i finansijskom poslovanju JU "Kulturno sportski centar i Radio Ilijaš" za 2017. godinu

## BENIS FAZLIĆ – direktor Radio Ilijaša

Mi smo u uvodnom dijelu ovog Izvještaja pokušali obrazložiti šta je ustanova i uposlenici radili u prethodnoj godini. Nastojali smo prije svega da ovaj radijski program približimo našim slušaocima, da u sportskoj i bibliotekarskoj djelatnosti se približimo našim građanima, da budemo na usluzi načelniku, službama, Općinskom vijeću, mjesnim zajednicama, udruženjima, fondacijama. Vi znate da je u sklopu kino dvorane napravljen i biznis centar, da su na spratu napravljene četiri sale. Izvještaj o radu je prihvaćen od upravnog i nadzornog odbora, također ću dodati da smo u prethodnoj godini radili rekonstrukciju grijanja, da je sportska dvorana prešla na sistem grijanja gradske toplane. Urađen je projekat utpoljavanja kino dvorane, zamijenili smo radio predajnike na Karašnici i imali smo nabavku auta uz pomoć sredstava općine Ilijaš. Kada je finansijski izvještaj u pitanju, da su prihodi bili 448.545,00 KM, a rashodi 440.295,00 KM i da je ostvaren pozitivan finansijski rezultat od 8250,00 KM. Ono što karakteriše ovaj finansijski izvještaj jeste u prihodovnoj strani, da su vlastiti prihodi manji za 13.000 KM. Kada je rashodovna strana u pitanju, ono što je karakteristično jeste povećanje iznosa za knjigovodstvene usluge. Mi smo u prethodnoj budžetskoj godini ostali dužni ovom knjigovodstvenom servisu koji radi usluge, tako da je taj dio izmiren i nemamo više u ovom periodu dugovanja. Najveći dio sredstava se organizuje na angažman stručnih ljudi, na opravkama i održavanjima, prije svega ovog repetitora na Karašnici. Radili smo na zaštiti farbanja antenskog stuba, zamjena linka na predajniku, sanacija krova, krečenje biblioteke, hodnika i kancelarija.

## SEMIR DIZDAREVIĆ – samostalni vijećnik

Kako čitam ovaj Izvještaj, sve sam više dojma da je najbolje u Ilijašu biti direktor Radio Ilijaša. Kako pratim iz godine u godinu, povećavamo izdatke za Radio Ilijaš, 2016-2017 povećanje za 19% od općine, od kantona 22%, paralelno sa tim vi manje radite. Sportska dvorana vam je smanjena za 16%, kino sala za 30%, marketing je pao za 1% isto tako i zakupnina. Na drugoj strani imate povećanje troškova telefona za 16%, interneta za 66% i reprezentacije za 22%. Vi sada sve ovo što radite i trošite u nekom normalnom svijetu bi trebalo da utiče na povećanje prodaje kino sale, marketinga, zakupnina, kod vas to obrnuto proporcionalno pada. Rekli ste da ste grijanje radili, to je pohvalno, ali me interesuje šta je riješeno po pitanju krađe novca ljudima i djeci koja dođu u dvoranu i zaključaju ormariće, jeste li išta po tom pitanju uradili, video nadzor, čuvar, jer je pisano na internetu vezano za krađe u samoj dvorani. Posljednjih dva mjeseca, jeste li probali otvoriti Internet stranicu Radio Ilijaša, ona je banovana, vjerovatno plaćate nekome održavanje pa bi bio red da provjerite je li se usluge izvršavaju.

## HALID DIZDAREVIĆ – vijećnik SDA

Drago mi je da je jednim velikim dijelom riješeno pitanje grijanja, spajanjem na ovu kotlovnicu, međutim tu još ima problema kao što je direktor iznio, a to je utpoljavanje i energetska efikasnost u koju se mi svi moramo uključiti kao Općinsko vijeće, te da omogućimo građanima i djeci korištenje ove sportske dvorane. Mi znamo da tu nastavu drži i srednja i osnovna škola i samim tim što ćemo skloniti tu omladinu u sportsku dvoranu, nećemo im dati priliku da se primaknu određenim porocima koji nisu dobri za naše društvo. Molim sve nas da se zajedno uključimo u ovo i da maksimalno riješimo pitanje grijanja sportske dvorane.

## MAHIR DEVIĆ – predsjedavajući

Diskusija kolege Dizdarevića je bila potpuno opravdana, očigledno postoji potreba da se mi malo aktivnije uključimo i da prije svega još neke stvari pomognemo i da izvršimo neku vrstu rekonstrukcije, da se razmisli za budućnost, jer očigledno je da ovakva forma Izvještaja neće biti dovoljna u funkciji onoga što općina Ilijaš treba da ima u narednom periodu. Ne bi bilo dobro da ne usvojimo Izvještaj, koji bi onda podrazumijevao nešto što je stvar bez plana, ja cijenim da mi trebamo danas podržati Izvještaj i usvojiti ga i smatram da svi mi, kao i Općinsko vijeće ozbiljno trebamo razmisliti o jednoj vrsti restrukturiranja stanja KSC Ilijaš. Očigledno je da će to nametnuti sama potreba i dinamika razvoja općine Ilijaš. Ja zaista cijenim da bi u nekom narednom periodu trebali sjesti i dogovoriti se na koji način će se ovo riješiti, kako osmisliti njen koncept, šta je potrebno uraditi da bismo to digli na jedan viši nivo. Kada je u pitanju Izvještaj, on je pregledan, najmanji je tu problem što je tu nekoliko hiljada maraka manje, direktor je to i obrazložio na neki način, to su male cifre da bi sada čovjek rekao to je negativna ekonomska tenedecija i sad nećemo glasat zbog te vrste priče, činjenica jeste da bi mi trebali ući u jednu ozbiljniju priču oko restrukturiranja navedene javne ustanove. Moja poruka jeste da podržimo današnji Izvještaj i da u narednom periodu definišemo sve tokove koji bi tamo trebali da se dešavaju.

## SEMIR DIZDAREVIĆ – samostalni vijećnik

Ja se zahvaljujem i zaista cijenim mišljenje načelnika i predsjedavajućeg. Ovo da je privatna firma ovdje bi davno bio ključ u bravi i treba nešto riješiti. Treba zamijeniti menadžment, primili smo nove mlade ljude u Radio Ilijaš, treba vidjeti ko je kompetentan, raspisati konkurs i neka se prijavi neko novi, napraviti sistematizaciju radnih mjesta i to je moj stav.

Diskutanata po ovoj tački dnevnog reda više nije bilo, pa je Općinsko vijeće većinom glasova usvojilo

Zaključak kojim se usvaja Izvještaj o radu i finansijskom poslovanju JU "Kulturno sportski centar i Radio Ilijaš" za 2017. godinu

AD-8

Prijedlog Odluke o davanju saglasnosti na Plan rada JU "Kulturno-sportski centar i Radio Ilijaš" Ilijaš za 2018. godinu

## MUHAMED HANDŽIĆ – vijećnik BPS-a

Ja sam već rekao sve na prošlom usvajanju ovog Izvještaja, pa se ne bih ponavljao, svi nedostaci iz prošle godine stoje i u ovoj. Što se tiče Plana rada sugerisem menadžmentu Radio Ilijaša da u svoj Plan rada ugrade malo aktivnosti i promociju aktivnosti koje se dešavaju na općini Ilijaš. Imamo niz infrastrukturnih projekata, informativna kuća Radio Ilijaš dođe na njihovom otvaranju, kada otvaramo put ili neki dom, oni dođu da to snime i to ide u eter. To bi trebalo da se proprati od samog ulaska izvođača radova na neke projekte pa do kraja, da građani imaju što više informacija. Naša tržnica je trebala biti završena 28 novembra, građani čekaju svake subote da ugledaju to svjetlo, pet mjeseci nakon isteka roka nije otvorena tržnica, do sada se trebalo putem Radio Ilijaša oglasiti barem nekoliko puta. Imamo na gornjem kraju u ovom periodu niz sjetvi, ljudi rade

heljdu, žitarice, zašto ne bi otišli gore nekoliko dana i to snimili da se promoviše Ilijaš kao jedna destinacija gdje se proizvodi sve to što se proizvodi na tom kraju. Što ne propratiti aktivnosti u koje općina Ilijaš ulaže 18.000.000 KM, od toga oko 12.000.000 KM kapitalnih projekata na području općine Ilijaš koji treba propratiti detaljno od početka do kraja. Nije samo napraviti šemu i propratiti Ilijaške dane i Čevljansku koridu, to je više svima poznato i to treba ostaviti iza nas. Treba pratiti šta se radi u Ilijašu, s pravom ljudi kažu vi ne radite ništa, a mi imamo jedan od najvećih Budžeta na Kantonu Sarajevo. Imali smo štrajk boraca, ljudi zovu koga god znaju od nas gdje se može izaći u Sarajevo. Mi smo prošle godine uradili put preko Bioče za Sarajevo, umjesto da Radio Ilijaša drugim informativnim kućama prebaci i obavijesti da mogu preko Bioče stići do Ilijaša, odnosno iz Ilijaša za Sarajevo. Ako treba da se ulaže, ako je malo ljudskih resursa dajte da i to pokrijemo, imamo sigurnu informativnu kuću na općini Ilijaš koja će nas promovirati, koja će prenositi ono što mi radimo u našoj lokalnoj zajednici.

ALMIR ŠPIODIĆ – vijećnik BPS-a

Šta ste planirali sa ovim kada ste rekli da za vrijeme Ilijaških dana neće biti trgovine. Napisali ste ovdje da se očekuje da će ove godine povodom potpune reorganizacije manifestacije da se preferiraju kulturno sportski sadržaji, a trgovina potpuno eliminiše. Da li će Ilijaški dani imati smisla bez trgovine? Meni ovaj Plan za kulturu nije jasan, ovdje se vi sve nešto nadate da bi mogli poboljšati i na kraju kažete da nema poboljšanja bez finansijskih sredstava, sve ovo što ste naveli može se desiti da se ne realizuje iz razloga što na kraju opet fale finansijska sredstva. Interesuje me samo za Ilijaške dane, čisto zbog javnosti šta je to novo planirano, ako neće biti kao do sad.

MAHIR DEVIĆ – predsjedavajući

Ono što smo mi povećavali u prethodnom periodu prema toj ustanovi, su bili isključivo kapitalni projekti, to smo mi radili kao politika i kao Vijeće. Nismo im davali po 50.000 KM za nedefinisane stvari. Definisali smo da rješavamo grijanje i riješili smo ga, definisali smo da treba automobil i to je riješeno. Nekako u vašim diskusijama ispada da smo mi dali 100.000 KM i ne zna se gdje, sve te projekte je odavde od nabavke do isplaćivanja provodila općina Ilijaš, ali su realizovani kroz ovu ustanovu. Povećali smo još jednu stavku tamo, koja se tiče usklađivanja plata na relaciji KSC i općina, kada su finansije u pitanju nije tu stanje loše, ovdje je stvar šta to mi želimo od te javne ustanove. Sve se zna za šta su se pare dale, sve te fakture u vezi toga imate kod Merime u finansijama vrlo jasno.

ALMIR ŠPIODIĆ – vijećnik BPS-a

Mi upravo o tome i govorimo. Mi konstantno imamo u opadanju javne prihode, imamo u opadanju vlastite prihode, a mi konstantno ulažemo pare. Ja nisam rekao da je problem što mi dajemo, mi možemo to i povećati. Ja mogu dati jednu ideju na koji način da poboljšate svoj sadržaj i da usput ostvarite Budžetska sredstva. Zašto ne bi u nekom od narednih perioda razmišljali da se ispred KSC ili na šetalištu organizuje u zimskom periodu ledena ploha, znamo da je to sada hit u svim gradovima i onako je tmuran grad u zimskom periodu, da bi to malo živnulo i da bi donijelo možda neku finansijsku korist Radio Ilijašu. Osim toga, možda će moja naredna inicijativa biti da se formira jedan sportski savez gdje bih ja predložio da se sva sportska infrastruktura daje sportskom savezu gdje bi se uključili svi klubovi koji se takmiče na području općine Ilijaš, mislim da mi za sport dajemo puno sredstava. Trebamo napraviti jedan sistem gdje bi možda trebali dati tu dvoranu na

upravljanje sportskom savezom vjerovatno bi to oni malo bolje i iskoristili.

MAHIR DEVIĆ – predsjedavajući

Podržavam ovu vrstu inicijative vezano za ledenu plohu. Što se dalje tiče Plana rada KSC, oni su napisali šta planiraju i mi reagujemo na dokumenat, kažemo da dodaju nešto i oni dodaju, kažemo dodajte priču oko plohe i oni dodaju. Nekako smo na diskusiju otišli na prethodnu tačku, ovo smo sve trebali kazati pod Izveštajem, a ne pod Planom, jer ovo što sada govorimo i ove primjedbe kojih je jako puno zaista je opravdano, pogotovo ovo u smislu vlastitih prihoda, ali smo sada na Planu rada KSC-a.

SEMIR DIZDAREVIĆ – samostalni vijećnik

Kada smo kod toga i upravo pričamo o tom pumpanju para u instituciju i gledamo ovaj Plan za 2018. godinu, članarine biblioteka su ostale iste a prošle godine potrošene pare za kupovinu knjiga što svakako pohvaljujem pa je valjda nekako ako ima više knjiga da će se više i čitati, da je ovaj prihod trebao biti veći. Prihodi sportske dvorane samo 5.000 KM, urađeno grijanje, treba obezbjediti ormariće da se ne krade i to bi trebalo biti veće. Prihod od kina, ove godine opet pet crtanih, to treba dići na jedan veći nivo da toga ima malo više, ovdje isto tako stagniramo. Prihod od marketinga 3.000 KM, predizborna godina nikad više stranaka u Kantonu Sarajevo za oglašavanje putem radija, putem web stranice za održavanje predizbornih skupova što u kino sali i sportskoj dvorani, to po meni mora rasti.

AKIF FAZLIĆ – općinski načelnik

Ja razumijem ovu vrstu inicijativa i želja da se zaista dođe do većih prihoda, ali jedino dobar plan jeste realan plan. Mi možemo imati i želje i ambicije, ali ako to nije na realnoj osnovi postavljeno nemamo mi ništa od takvog plana. Kada je u pitanju kino, prvo moramo čestitati KSC da kino uopšte i funkcioniše. U mnogim gradovima nema kina, ovdje prihod je najmanje bitan, bitna je funkcija da kažemo da u Ilijašu radi kino. Mi smo i TIK-i uputili jedan veliki projekat rekonstrukciju kino dvorane i digitalizaciju kina, to će biti oko 200.000 KM. Kino očito nije više kao što je nekad bilo i ne može prihod donositi, ali dajte da mi njega imamo i kada god ima neka prilika da ono može funkcionisati. Ista stvar je ovdje i biblioteka, knjižni fond raste i da imamo lijepu biblioteku. Prihod od sportske dvorane, ovdje je predloženo povećanje od 5.000 KM, ali 30.000 KM ako KSC inkasira za godinu dana to je već neka ozbiljna priča. Ono gdje im ja najviše zamjerim jeste marketing, oni se moraju boriti za marketing, on mora imati trend rasta i da taj marketing jeste i neka referenca ocjene rada menadžmenta kada su u pitanju vlastiti prihodi. Kada su u pitanju Budžetski prihodi, oni su zaista realno postavljeni i sada pitanje izdvajanje sredstava i onoga što mi finansiramo. Kroz rashodovno stranu vidi se šta se sve finansira, vidi se da je racionalna organizacija i sa aspekta broja zaposlenih, da su troškovi na jednom korektnom nivou. Ono što ja sporim jeste da angažman tih 13 uposlenih nije ni blizu isti, kada je u pitanju angažman ljudi koji rade u radiju i angažman ljudi koji rade u biblioteci i ljudi koji rade u sportskoj dvorani. Ja sam nezadovoljan sportskom dvoranom, neka su sredstva za plate ovolika kolika su danas u planu, ali da tih 13 ljudi opravdaju ta sredstva. Mi Plan trebamo gledati sa aspekta funkcije, da tamo ti novci budu na najefikasniji način utrošeni odnosno da daju najbolji rezultat. Ovaj Plan je zaista realan, čak finansijski teško do kraja on ne podupire sve ove aktivnosti, on također obavezuje menadžment da racionalno raspolaže sredstvima i obavezuje ga da ovo što smo govorili, da tamo svi rade

još efikasnije i uspješnije.

MUHAMED HANDŽIĆ – vijećnik BPS-a

Čudi me da načelnik nije rekao da nije zadovoljan ovim sektorom informisanja. Ja sam ovdje pričao o čemu se radi i slikovito sve objasnio i načelnik sada ode na sportsku dvoranu. Znamo mi šta se tamo sve dešava, ali nije ni ovaj sektor sjajan. Ono zbog čega u najvećoj mjeri postoji ovaj KSC, jeste da promoviše općinu Ilijaš i da tendenciozno izvještava građane o svemu. Opet ću se vratiti na primjer naše tržnice i doma u Podlugovima. Neka se objavi zbog čega se ne radi dom, zbog čega tržnica kasni. O kome god da se radi, izvođaču radova, neka znaju ljudi da je on neozbiljan. Načelnik je uvijek objektivan kad se tiče ovih ocjena, ali informisanje u ovom periodu je zaista puno zatajilo.

SEMIR DIZDAREVIĆ – samostalni vijećnik

Ja zaista cijenim ovo što načelnik govori, ali ovo mi donekle vrijeda i inteligenciju. Ova općina je doživjela procvat zahvaljujući vama načelniče i vašim zamjenicima, ona nije došla na ovo sada zato što ste vi sjedili skrštenih nogu. Nemam ništa lično protiv direktora, ali smatram da je realno da podnese ostavku i da dođe neko novi koji će nešto napraviti. Nijedan posao ne dolazi sjedenjem, dat ćemo mi 5.000.000 KM da se napravi biznis centar, ali da se nešto tu i radi.

MAHIR DEVIĆ – predsjedavajući

Očigledno će biti potrebe da se na ovoj temi radi, Izvještaj smo usvojili, Plan imamo i ja bih u ovaj Plan možda još dodao zaključak da se razmotri pitanje oko ledene plohe i da se proba malo povećati marketing, odnosno ti prihodi po osnovu marketinga. To su dvije stvari koje su u ovom momentu objektivne, uz ovaj amandman da se predlože još dva zaključka.

Diskutanata po ovoj tački dnevnog reda više nije bilo, pa je Općinsko vijeće, uz predloženi amandman koji je sastavni dio Plana, jednoglasno usvojilo

Odluku o davanju saglasnosti na Plan rada JU "Kulturno-sportski centar i Radio Ilijaš" Ilijaš za 2018. godinu

uz slijedeće Zaključke:

1. Zadužuje se menadžment Javne ustanove "Kulturno-sportski centar i Radio Ilijaš" Ilijaš da u zimskom periodu obezbjedi postavljanje ledene plohe u gradu Ilijašu.
2. Zadužuje se menadžment Javne ustanove "Kulturno-sportski centar i Radio Ilijaš" Ilijaš da u budućem radu nastoje povećati prihode po osnovu marketinga.

BELMA ZUKIĆ – direktorica JKP "Vodostan" Ilijaš

Prema rezultatima neovisnog revizora Izveštaj je pozitivno ocjenjen, sačinjen je u skladu sa međunarodno računovodstvenim standardima i pokazuje fer i objektivan položaj preduzeća na dan 31.12.2017. godine. Finansijski pokazatelji u prethodnoj godini su imali trend rasta, ostvarili smo dobit u iznosu od 246.738.000 KM, što je za 51% više nego u 2016. godini. Povećanje prihoda je bilo u iznosu od 9,57%, za cijenu povećanja troškova u iznosu od 5,57%. Kada analiziramo prihode i rashode vidljivo je da su svi prihodi koji su povećani iz redovnih poslovnih prihoda što nam je posebno zadovoljstvo, što znači da smo radili posao zbog kojeg postojimo i zbog kojeg smo osnovani. Kada su u pitanju troškovi, oni su uglavnom povećani na stavkama materijala sirovina i svih drugih inputa koji se koriste kako bi mi sve ove projekte koje smo realizovali uspješno i završili. Naša težnja u protekloj godini bile su usmjerene na poboljšanje svih vitalnih funkcija vodovodnog sistema. Sa posebnim akcijama na dva pravca djelovanja, a to je na rekonstrukciju vodovodne mreže na poboljšanje svih funkcija vodovodne mreže, koja je imala za cilj smanjenje gubitaka sa jedne strane, a sa druge podizanje nivoa kvalitete zdravstvene ispravnosti vode. U 2017. godini smo imali zaključen sporazum sa općinom Ilijaš o implementaciji sredstava i sporazuma o vodnim naknadama koji je uspješno okončan, pri čemu je realizirano i implementirano oko 560.000 KM. U okviru tih projekata rekonstruisane su ulice Ivana Franje Jukića, dio Bogumilske ulice, Hašima Spahića, prema Alića Gaju je izgrađen novi vodovod, kanalizaciona mreža u Ljubnićima, Donjoj Luci i osnovnoj školi Podlugovi. Ukupno je izgrađeno i zamijenjeno oko 7 km vodovodne mreže i 2 km kanalizacione mreže. U okviru ovog projekta i sredstava iz vodnih naknada urađen je projekat regulacije pritiska, to je prvi projekat takve vrste na teritoriji općine Ilijaš i on ima veliki značaj za našu općinu. Regulacija pritiska i držanje pritiska na nekom optimalnom nivou na vodovodnoj mreži je ključna stvar, jer na taj način preveniramo mrežu od pucanja sa jedne strane, a sa druge strane ukoliko već postoje nekakvi gubitci, oni se smanjuju što je i prema ovom Izveštaju pokazalo i rezultiralo smanjenje gubitaka u vodovodnoj mreži, koja trenutno iznosi 31%. Moram kazati da sve ovo što je urađeno u protekloj godini je urađeno krajem godine i da će se pravi efekti projekata pokazati tek u ovoj i narednim godinama. Rađeno je dosta i u drugom pravcu, a to je na podizanju kvalitete i higijenske ispravnosti vode. U tom smjeru smo realizovali projekat rekonstrukcije filterskog postrojenja na Karašnici, radi se o 100 l/s. U okviru njega urađen je i skada sistem na Karašnici koji je osim mjerenja, nadzora i kontrole omogućava daljinsko upravljanje nivoima vode u rezervoaru, jedan automatizovan i centraliziran stavljen sistem pod kontrolom na filterskoj stanici. Nabavljen je i agregat kao alternativa u snadbijevanju električnom energijom, to je nešto što ovo preduzeće ranije nije imalo i naš sistem u najvećem dijelu funkcioniše pomoću električne energije, jer svu vodu ispumpamo na Karašnicu obrada je uslovljena električnom energijom i distribucija, obzirom da imamo puno prempupavanja do krajnjih korisnika, jedan takav agregat je bio neophodan kako bi mi građanima mogli garantovati uredno vodosnadbijevanje i uslijed prekida snadbijevanja električnom energijom. U protekloj godini smo mi implementirali i sistem kvalitete HACCP, radi se o međunarodnom certifikatu koji obavezuje sve proizvođače hrane, obzirom da je voda hrana prema zakonskoj odredbi i mi kao komunalno preduzeće u segmentu vodosnadbijevanja smo imali obavezu implementacije tog sistema. On je garant svim našim građanima da je put vode od izvorišta do kranjeg korisnika apsolutno kontrolisan po

jednoj naučno zasnovanoj metodologiji. U smislu poboljšanja kvalitete, u protekloj godini je i općina uložila velike napore i finansijska sredstva, završeni su svi elaborati kojim su definisane vodozaštitne zone i zaštitne mjere na izvorštima za lokalne vodovode. Vijeće je također u protekloj godini donijelo odluke kojom su definisane vodozaštitne zone i određene sanitarne mjere koje se trebaju provesti na tim lokalnim izvorštima. Mi kao preduzeće smo pored tog normativnog dijela izvršili sve ono što je propisano, u smislu ograđivanja, postavljanja mjernih instrumenata i svih drugih mjera koje su tamo definisane. U finansijskom Izvještaju je vidljiv pad prihoda na pijaci, to je posljedica rješenja veterinarske inspekcije koja je zabranila prodaju namirnica animalnog porijekla, jer nisu bili stečeni uslovi za prodaju takvih namirnica, to se odrazilo na smanjenje broja klijenata a samim tim i prihoda. Još jedan momenat koji je značajno istaći, koji je uticao na pijacu jeste Izmjena zakona o unutarnjoj trgovini, gdje je obavezala sve trgovce na pijaci da se registriraju. Nama kao preduzeću je zabranila izdavanje kao pijačnog prostora ukoliko ljudi nisu registrirani, tako da je to na neki način sve prouzrokovalo da je na pijaci došlo da pada prihoda, ali evo tržnica se ovih dana otvara svečano i onda ćemo zajednički sa općinom definisati obuhvat i krenut će se na jedan zakonom propisan način.

SEMIR DIZDAREVIĆ – samostalni vijećnik

Ovo je jedna sušta suprotnost od prethodnog Izvještaja i ovo je Izvještaj koji zaslužuje svaku pohvalu i on će uvijek imati moju podršku i moj glas dok sam u ovom Vijeću. Direktorice vama svaka čast, čestitam vam, pregledao sam detaljno Izvještaj, od prihoda, kompletno sve je pozitivno i za mene kao neko ko dolazi iz privatnog sektora ovo je zaista odličan Izvještaj.

ALMIR ŠPIODIĆ – vijećnik BPS-a

Ja ću iskoristiti priliku da čestitam direktorici na obilnom i transparentnom Izvještaju. Ono što bih ja htio malo sugerisati jeste prilikom izvođenja radova Vodostana, da se malo povede računa o vraćanju javne površine u prvobitno stanje, jer imamo na nekoliko lokacija, gdje je radio Vodostan, da se desilo da je put ponovo propao ili da nije nikako vraćen u prvobitno stanje, samo bih to htio sugerisati ostalo je sve za pohvalu.

HALID DIZDAREVIĆ – vijećnik SDA

Također, htio sam da kažem kada su ovi prokopi u pitanju preko ceste, mi znamo da direktorica nekada nije ni u situaciji da utiče na to, jer firme koje rade puteve oni su i zaduženi za održavanje samih tih puteva, a direktorica može samo narudžbu izvršiti. U ime kluba SDA, mogu da pohvalim ovaj Izvještaj koji ćemo mi usvojiti i želim da čestitam direktorici i menadžmentu.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Izvještaj o radu i poslovanju JKP "Vodostan" d.o.o. Ilijaš za period 01.01.-31.12.2017. godine



## AMRA MATORUGA – direktorica Doma zdravlja Ilijaš

Dom zdravlja Ilijaš, jedan je od deset organizacionih jedinica javne ustanove i ima od 01.07.2017. godine 9 službi, koje po zakonu o zdravstvenoj zaštiti treba imati. Kartoteka porodične medicine broji oko 18.112 kartona, usluge pruža 11 timova i direktor organizacione jedinice, što zadovoljava potrebe po zakonu. Naš tim, jedan doktor i medicinske sestre, ide 1800 pacijenata, kod nas je taj omjer oko 1650. Predškolski dispanzer, ima dva pedijatrijska tima i ima 1650 kartona. Školski dispanzer ima oko 2000 kartona i jedan tim. U protekloj godini, na nivou organizacione jedinice Ilijaš, na dan 31.12.2017. godine, u procesu rada bilo je oko 100 uposlenika. Kako stoji u Izvještaju u 2017. godini mi smo obavili 148.092 pregleda i pružili smo preko 300.000 usluga. Povećan je broj pregleda u porodičnoj medicini, laboratorijskoj službi, radiološkoj službi i odrađeno je 6.400 pregleda. Radiolog radi pet dana u sedmici, od sredine prošle godine, generalni direktor odlukom je raspodijelio radiologa zbog ukazane potrebe u Organizacionoj jedinici Ilijaš, iako po standardima jedan radiolog ide na 100.000 stanovnika, tako da su liste čekanja u odnosu na prethodnu godinu znatno smanjenje. Krajem 2017. godine, generalni direktor je i doktora pulmologa raspodijelio da radi pet dana u sedmici, što je svakako olakšanje za naše građane, da se taj specijalistički pregled ostvaruje u našoj Organizacionoj jedinici i ne moraju ići u druge Domove zdravlja. Kada ustanova ima kadar na raspolaganju, generalni direktor je saglasan našim zahtjevima da i manji Domovi zdravlja dobiju specijaliste koji rade u punom kapacitetu pet dana, puno više od propisanih standarda. Manje pregleda i usluga, ostvareno je u službi CMZ i stomatološkoj službi, prvenstveno zbog nedostatka kadra i zbog toga jer nam nedostaju dva stomatologa. U toku 2017. godine, ustanova je uz pružanje redovnih pregleda, radila i sistematske preglede uposlenika u školama naše općine, učestvovali smo u okviru obilježavanja dana Kantona sa predavanjima našim građanima. Odrađujemo sistematske i preventivne preglede periodično, kada ustanova sklopi ugovor sa određenim kompanijama. Dali smo učešće u toku manifestacije Ilijaški dani, radili smo profesionalno, odgovorno i općenito smo zadovoljni našim radom u 2017. godini. Također mislim da su i pacijenti zadovoljni, jer se našlo rješenje i za usluge koje nisu dobili u našoj organizacionoj jedinici, da istu dobiju na nivou ustanove. U toku 2017. godine nije bilo pritužbi od strane pacijenata, tri pisane žalbe, usmene pritužbe smo rješavali na nivou organizacione jedinice, nije bilo žalbi pacijenata prema inspekcijama. Bila je jedna posjeta Kantonalne zdravstvene inspekcije, to je redovni nadzor obavljen u školskom i predškolskom dispanzeru, te od strane inspekcije nisu uočene greške u radu. Krajem 2017. početkom 2018. godine, određeni broj ljekara je dobio specijalizacije za Klinički centar, pa samim tim je bilo i raskida ugovora. Također, popunjen je broj kadra u porodičnoj medicini, sa pet prijema, od toga četiri nova doktora su stigla i jedan naš stari doktor Bumbulović se vratio i također još jedna doktorica iz Ilijaša se vratila sa specijalizacije u naš Dom zdravlja. Ovih dana ustanova dodjeljuje 30 specijalizacija, raspisala je konkurs, te će opet biti kadrovskih pomjeranja ljekara. U toku 2017. godine smo imali velike projekte, u smislu proširenja prostornih kapaciteta ustanove i adaptacije, zahvaljujući vladi Kantona Sarajevo, lokalnoj zajednici na koju smo svi ponosni, 28.02. 2017. godine smo završili najveći poslije ratni projekat na koji smo svi ponosni, nadogradnja oko 500 kvadrata centralnog objekta, dobili smo prostore za dvije službe, CMZ koji sada po standardima i normativima zadovoljavaju i novu službu, Centar za fizikalnu medicinu odnosno za upravu

organizacione jedinice. Krajem godine smo završili i adaptaciju objekta B, zamjena stolarije, adaptacija krova i mokrih čvorova u prizemlju ustanove. Od 01.07.2017. godine od dobijanja saglasnosti restornog ministarstva otvorena je zvanično i nova služba koja je jedina nedostajala, to je Centar za fizikalnu medicinu i imamo jedan tim koji radi u jednoj smjeni. Ustanova je planom nabavki, realizovala krajem godine nabavku određene medicinske opreme, koja će nam koristiti u daljem radu. Kompanija Bosnalijek donirala je namještaj prošle godine u centralni objekat, nevladina organizacije XY donirala tehničku opremu za CMZ službu. U 2018. godini primarni zadatak je popuniti nedostatak somatologa, taj problem traje od 2016. godine kada je raspoređen jedan stomatolog iz centralnog objekta i sredinom 2017. godine, doktor je završio specijalizaciju, tako da smo ostali u ambulanti bez stomatologa. Povremeno dobijamo ispomoć u radu iz drugih organizacionih jedinica, ali to nije trajno rješenje tako da se u tom smislu, na osnovu analize i ukazane potrebe, od strane direktora organizacione jedinice redovno upućuje zahtjev generalnom direktoru da se dobiju dva stomatologa. On je dao saglasnost, naši zahtjevi su prosljeđeni i odobreno je od strane resorne ministricе, koja je isto tako dala suglasnost za prijem, ali sredstva nisu obezbjeđena, to znači da naša ustanova dobija sredstva za plaće od Zavoda zdravstvenog osiguranja Kantona Sarajevo. Osim stomatologa na moj prijedlog, direktor je saglasan da se popuni služba CMZ sa psihologom i taj zahtjev je otišao prema ministarstvu i ministrica je također odobrila zahtjev za prijem. Organizaciona jedinica Ilijaš redovno traži da se kadrovski ojača i sa određenim brojem medicinskih sestara, tražimo dvije sestre i radnica na održavanju higijene. Krajem godine napravljena je analiza opterećenosti, te je upućen prijedlog od strane direktora Organizacione jedinice da se formira još jedan tim, da bi služba mogla zbog specifičnosti pružati usluge u dvije smjene i sa tim prijedlogom je saglasan generalni direktor te je ostavljeno da će razmotriti mogućnost uvođenja druge smjene. Planom nabavki javne ustanove, Domovi zdravlja za 2017. godinu planirana je kupovina određenog broja ultrazvučnih aparata. Na osnovu ukazane potrebe i dogovora, generalnog direktora sa direktorom Organizacione jedinice i načelnikom općine, obećano je od strane generalnog da jedan ultrazvučni aparat dobije naša ustanova. Danas ću vas sa zadovoljstvom izvijestiti da smo prije tri dana, od tri ultrazvuka koje je ustanova kupila, jedan je isporučen našoj Organizacionoj jedinici. Planom je predviđeno da se nabavi stomatološka stolica u ambulanti u Podlugovima, ista je u fazi nabavke i određeni broj sanitetskih vozila. Mislim da ćemo najdalje za jedan mjesec dobiti jedno sanitetsko vozilo. Na jednom od sastanaka sa restornom ministricom, ministrom finansija, generalnim direktorom ustanove i načelnikom dogovorili smo da će ministarstvo zdravstva za 2018. godinu planirati kroz grant od 1.000.000 KM prema ustanovi, dodatnih 60.000 KM i to smo preusmjerili za nabavku aparata za biohemiju za laboratorijsku službu. Ta usluga koju ove 22 godine moramo da ostvarujemo na taj način što krv kada vadimo našim pacijentima, svaki dan se ona transportuje u centralni laboratorij organizacione jedinice Vrazovo, zbog toga bi trebalo da se kompletna laboratorija radi u našem Domu zdravlja. Dalji Plan bi bio nastavak adaptacije mokrih čvorova u centralnom objektu, zamjena garažnih vrata i ventila, taj projekat je planiran za 2017. godinu. Općina je kroz svoj Budžet planirala, a na osnovu dogovora sa direktorom organizacione jedinice da kupi aparat za magnetoterapiju. Načelnik općine nam je odlukom, početkom ovog mjeseca prebacio oko 7.000 KM za nabavku roletni na službama u centralom objektu gdje gdje ja promijenjena stolarija i taj projekat je u fazi nabavke. Sve pregleda i usluge pruža i naša organizaciona jedinica, ljekari su raspoređeni po standardima, prema broju stanovnika, nama se čini da je to malo da ima prostora da ima više tih specijalista, jer bi naša ustanova rasporedila i više ljekara nego što nalažu standardi. Upoznata sam da je u zadnja dva mjeseca, rad interniste povećan za jedan dan, prošle godine doktor je radio dva puta sedmično po pola radnog

vremena, jer radi u Domu zdravlja Ilidža, sada je to povećano za cijeli radni dan. Oftamolog je radio dva puta sedmično, direktor dr. Baltić je dao obećanje da će od idućeg mjeseca pojačati Organizacionu jedinicu Ilijaša, sa tri puta sedmično i oftamolog de na 40.000 stanovnika. Neurolog je najdeficitarniji na nivou ustanove, oni idu na 70.000 stanovnika da bi radio pet puta sedmično, on nama dolazi jednom sedmično i mislim da se situacija neće brzo popraviti, ali naši pacijenti mogu to da ostvare u najbližem Domu zdravlja u kojem ima neurolog, a to je Vrazovo. Otorinac koji radi dva puta sedmično, po standardima zadovoljava i on ide na 60.000 stanovnika.

AMELA KOMILIJA – predstavnica Zavoda za hitnu medicinsku pomoć

Ja sam došla ispred Zavoda za hitnu medicinsku pomoć Kantona Sarajevo i obavljam funkciju rukovodioca edukativnog centra. Ono što sam ja mogla vidjeti iz Izvještaja u odnosu na proteklu godinu, jeste da je manji broj pacijenta, a mi znamo reći da volimo što je manji broj pacijenata, jer naše kolege su odmorne, naše ljudstvo je odmorno, potrošili smo manje para, a stanovništvo nije imalo potrebe za hitnu medicinsku pomoć.

NIHADA IBRAHIMOVIĆ – predstavnica Zavoda za zaštitu žena i materinstva Kantona Sarajevo

Ja bih prvo htjela da se zahvalim načelniku na ultrazvuku koji smo željno čekali i on se koristi maksimalno. Od sedmog mjeseca pa do kraja prošle godine imali smo oko 2.900 pregleda. Što se tiče usluga, ispunjava sve, samo ako bi mogla jedna molba, a to je da ne bi bilo loše kada bi se mogle obezbjeđiti psihofizičke vježbe za trudnice, jer ima potencijala za to, jer ima dosta mladih trudnica, koje su jako mlade i koje apsolutno nisu spremne za trudnoću i automatski to shvate kao bolest. Također imamo u planu i to da se radi ultrazvuk dojki, da pacijentice ne idu u Zavod, jer u Vogošći je bila kolegica ali je ona trenutno na porodiljskom.

MUHAMED HANDŽIĆ – vijećnik BPS-a

Zaista je zabrinjavajuća činjenica ovo poređenje, treba nam jedan kardiolog na 40.000 stanovnika, jedan neuropsihijatar na 50.000. Ne znam ko je pravio te parametre i čime se rukovodio, trebalo se rukovoditi da je ovo društvo oboljelo u velikoj mjeri. Ja mislim da nama trebaju tri neuropsihijatra i kardiolozi, sve ovo što je najbrajala direktorica da je nedostatak ili o čemu je govorila da nam je odobren stručni kadar u tom sektoru, odobren jeste ali nisu odobrena sredstva za njegovo plaćanje. Mi imamo potrebe za tim kadrovima u našem Domu zdravlja, imamo prostor koji je obezbjeđen, a nemamo stručne kadrove. Mislim da je ona inicijativa, koju je uputio predsjedavajući vijeća prava adresa i da ćemo mi morati održati jedan sastanak ovdje sa predstavnicima Zavoda zdravstvenog osiguranja po pitanju zdravstvene zaštite naših građana na općini.

HALID DIZDAREVIĆ – vijećnik SDA

Mi smo na početku ove sjednice uputili inicijativu za sastanak koja će nadam se identifikovati određene probleme i biti pozitivan rezultat. Interesuju me ove brojke od 40.000-50.000 stanovnika na jednog specijalistu, da li se ikada radila statistika koliko je jedno stanovništvo oboljelo na određenoj općini. Vidio sam u Izvještaju da je broj pregleda za 50.000 veći, automatski bi i kadar trebao biti brojniji. Kada je u pitanju pedijatrijski rad, sve pohvale za ove dvije smjene, međutim subotom i nedjeljom su stanovnici primorani da

idu u Vogošću ili Vrazovo. Postoji li mogućnost da se napravi jedan dan u vikendu, gdje će biti jedna smjena da ljudi ne bi morali stalno ići u Sarajevo? Čestitam na ultrazvuku, čestitam načelniku i toliko za sada.

MAHIR DEVIĆ – predsjedavajući

Mi smo u kontinuitetu posljednjih osam godina zaista se potrudili da milione maraka uložimo u sistem zdravstva u Ilijašu. U toj dugogodišnjoj praksi smo došli do jednog vrlo jasnog zaključka, da sve ono stvari koje se odvijaju, u ovom slučaju zdravstvene usluge na području općine Ilijaš, sve ono što nije pod kontrolom na neki način u smislu upravljanja ljudskim resursima od strane općine Ilijaš mi sa tim imamo probleme. Ja razumijem poziciju direktorice, ona je došla i podnosi nam Izvještaj za ono za šta se ona ne pita i ja sam toga svjestan kao neko ko je u politici. Sve te odluke se donose gore u Sarajevu i ona na neki način je suočena sama sa sobom. Mi, kao Općinsko vijeće, morat ćemo po ovom pitanju nešto poduzeti, jer ne možemo više sebe držati da smo mi građani drugog reda kada je ova oblast u pitanju u Kantonu Sarajevo. Kroz lične primjere sam nekoliko puta bio u situaciji da se sa nama igraju, u smislu nekih sistema koji se stalno mijenjaju, taman se napravi nešto oni to pokvare. Dobili smo mladu strukturu doktora i nikako nismo u stanju da napravimo neku situaciju, da imamo neku politiku koja će se voditi od strane te javne ustanove koja će podrazumijevati da se tu obrazuje naša djeca koja će voljeti ovaj grad, koji će tu živjeti. To je jedan veliki sistem i bojim se da je Ilijaš na repu tog sistema i mi smo pod vijećničkim pitanjima i inicijativama usvojili Zaključak. Ukoliko javna ustanova nije u stanju, u gradu od 25.000 stanovnika obezbjedi kardiologa, onda neka to urade privatne ustanove koje će platiti Zavod zdravstvenog osiguranja i mi ćemo to tražiti političkim sredstvima. Standard ovog Ilijaša danas kakav jeste, nije standard Ilijaša kakav je nekada bio. Mi smo danas jedna ozbiljna općina kojoj ne predstavlja problem investicija od pola miliona maraka, ali ako nas neko stalno "ganja" sa ovim nekim normama onda smo mi u problemu. Nama trebaju stručni, čestiti ljudi koji vole ovaj grad, koji hoće da rade, ako to direktoru Domova zdravlja nije jasno onda mu to neko treba prenijeti i objasniti. Prvo, danas je trebao doći ovdje, barem iz poštovanja prema ovom organu, ja nisam ovdje bio ovih dana i vjerujte da bih skinuo ovu tačku Dnevnog reda. Za razliku od svega toga, imamo Hitnu pomoć Kantona Sarajevo, gdje nismo ni na jedan problem naišli, najveći problem je bio da je uvedemo, ali i to smo ostvarili. Ako javna ustanova Domovi zdravlja Kantona Sarajevo nema dovoljno stručnih i kvalitetnih pedijatara, kardiohirurga neka ih onda nabavi u privatnom sektoru i neka ih plati Zavod zdravstvenog osiguranja. Ja ne želim ljudima da ulazim u struku, jer ja nisam u ovoj struci, ali očigledno je da mi imamo probleme u tom smislu. Mi sada sebe dovodimo u situaciju da raspravljamo o strukama ljudi i ne želim zaista to da radim, trebaju nam najbolji ljudi i očigledno je da sistem škripi, tu se stvari moraju mijenjati. Mi ćemo ići sa ovom vrstom inicijative prema Zavodu, ministarstvu ili ćemo napraviti pritisak na aktuelnu ministricu Zdravstva i direktora Doma zdravlja da ovo pitanje popravi ili ćemo zaista tražiti da uđe privatni sektor u Ilijaš, ako se to desi otići će vam 90% građana u privatni sektor, kao što i sada ode u apoteku i uzme lijek i Zavod ga plati da se ne igramo više. Zaista nemam ništa protiv direktorice, ovo su stvari koje nama serviraju iz Sarajeva i zato sam ja na ove stvari reagovao.

Diskutanta po ovoj tački dnevnog reda više nije bilo, pa je Općinsko vijeće primilo k znanju

Informaciju u oblasti zdravstva na području općine Ilijaš za period  
01.01-31.12.2017. godine

Nakon što je iscrpljen dnevni red, zamjenik predsjedavajućeg Alen Hasković zaključio je devetnaestu sjednicu OV-a Ilijaš u 12:20h.

Zapisničar:  
Maida Habibović

ZAMJENIK PREDSJEDAVAJUĆEG  
OPĆINSKOG VIJEĆA ILIJAŠ

---

Alen Hasković, MA šum.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
Broj certifikata:20938

